

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 22.3.2012 18.05 Uhr** auf 94.0 bzw. 87,7)

Leev Toehörers,

van de 1. Mannskupp van Kickers Emden kann ik ok disse Week keen Spölbericht geven. Van de Spölen um de DFB-Pokal van Führt tegen Borussia Dortmund de mit 0:1 utgahn is un van dat Spöl güstern Abend van Borussia Mönchengladbach tegen Bayern München, de beid in de Kiekkast overdragen wurren, kunn ik heel Bült vertellen. Junge, wat könt sükse Spölen mennemaal ok trurig ut gahn. Glück hört bi sükse Spölen ok dortoe. Man dorvan leevt ja de Foetball.

Aber wi sünd hier ja in Sendung van de BSV Kickers Emden un so will ik van twee Jögdmannskuppen van disse Vereen vertellen.

De C-Junioren spölten lesd Sönndag bi de Tabellenföhrer SV Meppen up Kunstrasen un hebben mit 1:4 verloren. De Emder Jungs spölten in de eerst 20 Menüten heel nervös, ja, se harren wall ´n bietje Angst, de Bux vull, so as wi Oostfreesen seggen. Al in de 3. Menüte lepen twee Ofwehrspölers vull tegennanner an, so dat de Meppener dat 1:0 sketen kunnen. In de 24. Menüte dann dat 2:0. Kickers harr dör **Benjamin Neiraij** heel groot Kans, as he alleen dörgung, man de Torwart hull. **Florian Harberts** skoot dann in de 40. Menüte dat Tor för Kickers. In de tweed Halvtied spölten de Kickersjungs goed. As se all na vörn smeten, kregen se noch twee Toren inskunken.

De Jungs van de U19 van Kickers Emden hebben na 19 Spölen, de se neet verloren hebben, in de Neddersassenliga maal weer verloren, un zwar mit 1:2. tegen de VFB Hildesheim. Al in de 13. Menüte gung Hildesheim in Föhren un mook in de 38. Menüte dat 2:0. Na de Pausentee störmte Kickers Emden, man mehr as een Tor in de 77. Menüte dör **Gökan Bathbay** kwamm dorbi neet rut. Jede Serie ritt maal, dorum sullen sük de Spölers van Kickers Emden dor neet völ utmaaken. Se hebben bither ´n heel goed Saison spölt un de Trainer **Yasin Turan** kann stolt up de Mannskupp wesen.

Dat Jögdbaas **Bernhard Meyer** sien Amt na over 30 Jahr daalleggt hett, dat beduur ik. Villicht overleggt he sük dat ja noch maal. Löppt neet immer so, as man dat meent.

För de 1. Mannskupp geiht dat Saterdag na Göttingen. Ik hoop, dat dat Spöl, de in de Oberliga Neddersassen ansett worden is. ok dörföhrt word. Eenige Fans menen in de Fan-Forum, dat dat noch neet seker is. Ik löv, wenn dat so was, dann harren wi al wat van de Vörstand van Kickers Emden hört.

Ik drück de Mannskupp bei Dumen, ok wenn dat heel stur in Göttingen word. Wenn ok verloren word, dat is moi, dat de eerst Mannskupp weer maal weer ´n Spöl hett. Heel moi, was dat ja, wenn ok noch ´n paar Fans de wied Reis na Göttingen mitmaken würrn.

Noch eens, dat is ja wall ´n Witz, dat de Mannskuppen, de neet tegen Kickers antreden, blot ´n Straaf van 15 Euro kriegen. Wat is dat för ´n Verband; fraag ik mi.

So, as alltied, toe Schluss noch ´n Foetballwitz.

De dütske Bundespost hett, um de Verdennsten van **Mario Basler** toe würdigen, een Breevmark mit sien Bild rutbrocht. Bi de Gebruuk stellt sük allerdings rut, dat de Marke neet up de Breven hollt. De insette Untersuchungskommission kommt na eenige Maand toe folgende Resultat:

De Breevmark is heel un dall in Rieg. Ok an de Klever giff dat nix uttoesetten. De Kunden spejen (spucken) up de verkehrt Sied.

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.
Bit anner Maal
Joe
Erich Bolinius
ut Emden-Petjem.